



KOMUNIKADO PA PRENSA

REPRESENTANTE DI METEO TA PARTISIPÁ NA TAYER INTERNASHONAL DI SIKLON TROPIKAL NA SÛIT KOREA

Willemstad – For di 1 di dezèmber, Organisashon Mundial di Meteorologia (OMM) ta organisá e di Ocho Tayer Internashonal riba Siklonnan Tropikal na e isla Jeju na Repúblika di Korea.

E aña aki un komité internashonal a skohe Servisio Meteorológiko Kòrsou, pa nominá un meteorólogo pa partisipá na e tayer aki. Señor Marshandy “Andy” Luciano, un di e meteorólogonan di nos, lo ta un di e representantenan di Área di Karibe na e tayer aki. OMM lo kubri tur su gastu konserní ku e evento aki.

OMM ta organisá e tayer aki kada kuater aña i kada biaha, esaki ta tuma lugá den un otro region. E aña aki, e ta tuma lugá den e region di taifun, esta e na e parti ost di Asia. Meta di e tayer aki ta pa sientífikonan, riba tereno di siklon tropikal, interkambiá nan eksperiensha ku meteorólogonan operashonal.

E interkambionan aki ta pa entre otro:

1. mehorá modèlnan di kòmputer ku ta usa pa pronostiká ruta i intensidat di siklon tropikal;
2. diskutí teorlanan di mekanismo relashoná ku desaroyo di siklon tropikal.

Asin'ei tur dos grupo por siña di otro su eksperiensha. Huntu ta traha pa mehorá nan kapasidat pa pronostiká i atvertí públiko, mundu di aviashon, i nabegashon mas mihó posibel den kaso ku tin un menasa di siklon tropikal den un sierto region.

Algun tópiko ku lo bini dilanti den e tayer aki ta:

- avansenan resien den kapasidat pa pronostiká desaroyo di orkan,
- komunikashon i sistema efektivu pa atvertí komunidad,
- struktura i kambio di struktura di siklon tropikal,
- trayekto i kambio di intensidat ora ku un orkan yega tera,
- i diferente tópiko interesante mas.

Riba e potrèt (siguiente página) por mira señor Luciano (man drechi) den kompania di Dr. A. Martis, direktor di Servisio Meteorológiko Kòrsou den sala di “check in” na Airopuerto Hato.

